

策鰲雜撫

策鰲雜摭序

船中童女雲迷采藥之山海上神仙日出扶桑之國
槎既隨乎奉使冠還戴夫遠遊兩載投羅皆徐福島
之事實一編撰述變吾妻鏡之體裁此葉君新儂策
鰲雜摭之所由著也在昔君客東瀛我居中土誦柳
惲秋雲之句圖畫爭先愛王灣海口之詩傳抄幾徧
蹤留墨水識面無從人隔丹山傾心有素今春三千
客路來從謹母峯前五兩風帆歸自滕王閣畔寄身
申浦其作客星握手庚郵快來新雨相逢萍水結契

苔岑鷄駝同鳴餘駮合處辱承訪戴謬荷推袁陽源
見謝莊之文至爲筆擱君苗讀陸機之賦竟欲硯焚
君真具此虛心我乃無其實學喜稱長於彥輔善掩
過於平陽文不斥夫疥駝途豈識乎老馬竊附子山
之體慚無元晏之文出示此編屬爲惶引君襟懷月
朗氣度風和學勵燎麻業勤漂麥四千許卷陳留不
忘五十八籤夾漈背誦故能博片石韓陵之譽著重
差夕桀之章辱殷往嗣於菰蘆國僑早擬稱羅君章
爲杞梓司馬久推北海賢豪惟孫賓石可許東京信

士舍來君叔其誰而且柳下氣和袒裸不浼太邱交
廣雅俗俱容聽裴邈之談如調琴瑟入苟令之座不
盡芬芳況復吐珠玉於口中生煙雲於腕底五言競
賦擅皮陸之清才六法偏精追倪黃之逸格辨詩家
廿四品不外性情列畫學十三科尤工山水蓋我

國家皇人綦幣海國梯航肅慎越裳稽顙而入貢天方
古里革面以來庭皇華一歌星輶四出造鑿空之使
通修好之儀險越餒宮遙持龍節時日本副使張公
嚴節度之愛杜南幕府爭招裴中令之敬景仁後車

競載於是入蝦夷之島經獅子之洋鯨眼射波紅明
千里鯨身出水黑若三山卻超爲幕中上賓濮陽是
戟門揖客元康七紙頃刻立成齡石百函紛紜並發
迷離錦繡春看蛭島之花浩渺煙波秋泛鴨河之櫂
爰將六十六州之風化日事拮據五十二國之見聞
時勒記錄條抄類摘納于白傳瓶巾晨寫晝書付之
蘇公筆底至若五畿之外疆域斯恢八島之中版圖
式廓鵠崎縣巨攷其山川象嶺巍峩審其形勢鴻濛
以外政體能詳龍漠而遙官制亦問紀風俗於熊野

表物產於蛤洲以及中華之與東人炎漢以至

聖代戰則干戈肇豐和則玉帛來朝莫不載在蒲編登
諸竹簡網羅散佚囊括無遺其到祖洲方朔能紀其
風物同遊福地張華不忘夫睹間況乎蕭茂挺之文
章早傳倭國溫子昇之著作久播遐方彼秦中歲時
猶在海內南方草木尙屬域中而是書則考古證今
遠渡樂浪之海采風聞俗遙從析木之津得自耳聞
或虞誕妄來從目擊不慮虛無異域旁搜越丹栗黃
支而外名山獲壽藏金匱石室之中豈徒橫目皆知

定得不脛而走千秋不朽同夏禹大荒之經一卷長
留似張騫出關之記

光緒十三年歲次丁亥孟秋長洲秦雲序於海上寓
齋

葉君新儂遊東瀛歸成策鰲雜撫一書詳記東海風
土人情大而山川國邑小而一邱一壑上而開國源
流下而一材一藝無不羅列而詳載之使見其書者
無異把臂東遊雖以鄙人之足跡不出域外者亦不
至如海上三山之可望而不可卽其餉人也多矣僕
於東瀛諸名士頗有契合如岸吟香國鹿門井上子
德北條鷗所諸先生皆以文酒往還時相過從間嘗
詢以東國風俗道其職官政治則其所言皆一一與
葉君之書相吻合以視他人之耳食者蓋不啻霄壤矣

拜讀一過書此以誌欽佩古越高昌寒食生何鏞柱
坐前拜手

余於庚辰夏重至日本辛巳春再遊西京寓於屋宗
仲新儂繼至主曉翠樓逆旅相望晨夕過從相得甚
歡於時新儂憊甚每觀其藹然澹然言詞訥訥酒酣
以往上下古今娓娓不倦畧無窮蹙無聊之狀余竊
異之逮癸未余過滬瀆乙酉丁亥數數邂逅其憊如
故新儂處之怡然相見每出近作相質證比來白下
一揖後都不及寒暄應酬語出巨帙見示開卷乃其
所輯策熬雜摭皆綜日本見聞條分縷析無夸飾附
會留氣其於疆域徭賦官制俸糈精兵額軍艦山川關

隘考覈最詳具見經濟新猷平日耽於詩是編叙論
有致而於采掇軼事時寓深意以視流連風景記載
瑣屑者蓋非可同日語也當憾軻窮阨之時適能用
心若此吾未有以窺其際矣循覽累日愛莫能釋慙
愚開雕以公同好云

光緒十有四年仲秋宗愚兄煒松石甫拜識於白門
瞻園之東軒

策鰲雜摭序

周秦之時相傳東洋諸島嶼均係蝦族種類寥落自
徐福挈童男女數千東渡後生齒日繁成邑成都久
之聚爲郡國於是逐諸蝦之種立君主以自治長崎
島左近至今有徐福墓徐福祠焉隋唐時猶有數嶼
屬蝦類嗣後日漸衰微狃獠之俗一掃而空自秦漢
以來二千年一姓相承全國跨有四大島中多火山
四面環海海水均從赤道熱海北流而下故夏無酷
暑冬鮮嚴寒地形由東北而西南綿長三千餘里極

寬處不過四百里觀其形勢儼若我東海數千里門
戶外樹一屏藩也顧其地與中華同處亞洲壤地相
接有唇齒輔車依附之勢但願不分畛域各抒真誠
永無猜忌之端共保太平之局亦未始非兩國生靈
之福焉兩國之福亞洲之福也僕牖下書生足跡未
遠雖乘風破浪之味亦經淺嘗然不過徐青幽燕近
在咫尺終以未作海天之遊爲憾平日於經史天算
地理兵法格致之外各國史籍厯經考證雖於風土
政教之得失略知一二究未若目擊而身歷者之得

之真焉吾友策鰲遊客遊東國兩年旣歸一一爲余
言國制而外如山水之秀麗樹木之蒼古氣候之溫
和民俗之文柔遠遊野行絕少盜劫殺奪之患津津
然談數時不倦予亦甚樂聞之此可見東土之宜人
而東人之入人者深矣固不必強指爲蓬萊瀛洲卽
此實在情形已不啻天壤間之樂土矣遊客於平日
或得之目擊或經之身嘗或搜之載籍或求之訪問
上而世系年表政教號令下而山川形勝習尚情僞
莫不筆之於書條分縷晰輯成八卷顏曰策鰲雜據

錢版甫成袖是書惠然而來辱以序相屬予受而讀之識見益啟雖其大旨不外乎曩之所聞然於天時人事之變遷因革則又加詳矣實足助博覽家之考鏡也不獲已謹贅數語於簡端異日結伴東遊吾更有以資矣

光緒第一己丑律中蕤賓之月吳縣葉耀元序

新儂仁兄大人閣下前月奉

還書示以

大箸策熬雜摭目錄凡例賅綜巨細條理秩然雖未
見全書而已深欽佩矣吾鄉多此一佳著作更富爲
志乘生色也

委撰敘言誼固不可辭惟既有秦膚雨先生一敘想

見才人之筆情文相生弟文心之麤有類愴父豈不

相形見絀崔君苗見陸士衡固當焚硯耳弟前請總

署借鈔足利學論語皇疏真本無識者反疑爲僞雖

已鈔送尙未發刊古書湮晦實可痛惜倘

尊箸續摭中存其梗槩以詔來者則此書或得以終
顯於世未始非

閣下之功也皇氏有知必當首肯茲特遵

明諭將原稟稿寄上以備

采錄至總署咨行東使署公文行篋中並未鈔存記
前年秋間曾見於滬報請

一檢之東海寓公明季最多弟曾託重野成齋就其

史館所藏羣書檢核姓氏得數十人事蹟亦多有可